

Cartulaire de l'Abbaye de Redon en Bretagne: [832–1124], Nr. 358

Post multa vero annorum curricula, quidam miles Helocus nomine, filius Leran, ortus nobilibus parentibus, surrexit, homo ferox crudelisque moribus omnique humanitate carens. Prelibatam Sancti Salvatoris invasit terram, sueque subiugavit ditioni. Interea extitit monachus Morvanus quidam nomine, ex eius prosapia ortus, vir bonus et sapiens modis omnibus, et alius Iarnogonus nomine, qui eo tempore super villulas Brogueret curam gerebat. Ex precepto monachorum eum commonuerunt sepe ut ab invasione tandem resipisceret, quod ille minime verbis eorum adquevit. Sed in sua malicia perduravit usque ad exitum vite. Filii quoque eius in duricia permanentes, verbis exortatoriis non adqueverunt. Sed unus eorum, Guethenocus nomine, sub excommunicatione defunctus est. Solus vero Fredorius remansit superstes, quem allocutus est Iarnogonus monachus ut terram dimitteret filiumque suum in monasterio mitteret; quod ille verbis monachi, Dei instinctu cummonitus, assensum dedit, filiumque suum, Simon nomine, Sancto tradidit Salvatori in manu Rotberti abbatis, cum predicta terra et cum tota decima Trefhidic, que constat septem villulis tam ex annona quam ex vitulis, pullis, agnis, porcellis, necnon et galois supradictis villulis, sine censu et renda ulli homini sub caelo preter Salvatori servitoribus. Addidit etiam insulam ubi monasterium constat constructum et domum monachorum. Facta sunt haec coram multis nobilibus viris: Fredorius, qui donum dedit cum filiis et fratribus filiumque obtulit, testis; Guihomarc, testis; Heden filius Commalkar; Gurgavel; Bernardus filius Gurdiern; Aluuret, presbyter; Leran, presbyter; Halogonus frater eius; Daniel, testis; Kanevet, Roderic, Heden, Riualionus, Rotbertus, abbas, qui donum suscepit; Iudicalis, prior; Riualionus; Modestus, monachus; Iarnogonus.